



## Nakon SFRJ svi imamo “novu prošlost”

Sonja Biserko analizira naslijeđe Haaga, a domaća SIPA hapsi zbog zločina u Konjicu

Piše: **MAJA ABADŽIJA**

Predsjednica Helsinškog odbora za ljudska prava Srbije Sonja Biserko u intervjuu za Oslobodjenje kaže da je u državama nastalim raspadom SFRJ kreirana “nova prošlost” i unutar svake od njih još traje rat sjećanja - od Drugog svjetskog rata do rata iz 90-ih.

- A nova slika prošlosti postala je referentni okvir za tumačenje savremenih zbivanja, ističe Biserko, te napominje da je važno vratiti se na početak rata, hronologiju, mape, ratnu retoriku koja je otvoreno najavljivala zločine.

- Zbog svega toga nasleđe Haškog tribunala jeste polazišna tačka, jer ono ne dozvoljava manipulaciju brojevima, činjenicama, dokumentima, smatra Biserko.

A po naredbi Tužilaštva BiH, jučer su pripadnici SIPA na području Konjica i Sarajeva slobode lišili 13 osoba zbog zločina protiv čovječnosti. Riječ je o zločinima počinjenim nad Srbima konjičke općine.

Predsjednik Udruženja Konjičana iz RS-a Zoran Pologoš tvrdi da za zločine nad Srbima Konjica postoje nepobitni dokazi, jer je u samoj Bradini ubijeno 88 ljudi.

- Odgovorni su tadašnji vrh Armije RBiH u Konjicu, krizni štab i vlast u Konjicu, ističe Pologoš. /STR. 4, 5 i 7.

## Hapšenja zbog zločina nad Srbima iz Bradine

Pripadnici SIPA jučer su uhapsili 13 bivših pripadnika ARBiH, a iz udruženja srpskih žrtava ističu da su problemi u Konjicu počeli dolaskom Splitske satnije

Postupajući po naredbi Tužilaštva BiH, policijski službenici Državne agencije za istrage i zaštitu (SIPA) jučer su na području Konjica i Sarajeva slobode lišili 13 osoba zbog zločina protiv čovječnosti. Uhapšeni su zbog postojanja osnovane sumnje da su počinili kazneno djelo iz člana 172. KZBiH - Zločin protiv čovječnosti, na području općine Konjic tokom 1992. godine. Nakon ispitivanja osumnjičenih, postupajući tužitelj uputio će prijedlog za određivanje mjera pritvora Sudu BiH.

### Čelebići i Musala

Slobode su lišeni Šefik Nikšić (1945), Mitko Pirkić (1962), Adnan Alikadić (1962), Safaudin Čosić (1974), Muhamed Cakić (1968), Ismet Hebibović, zvani Broćeta (1956), Redžo Balić (1952), Hamed Lukimirak (1971), Almir Padalović (1968), Sead Jusufbegović (1941), Senadin Čibo (1967), Agan Ramić (1962) i Esad Ramić (1966).

Oni se sumnjiče za zločine počinjene u proljeće i ljeto 1992. na području Konjica i okoline, koji su rezultirali uklanjanjem i prisilnim preseljenjem gotovo cjelokupne populacije stanovništva srpske nacionalnosti s ovog područja. Među navedenim zločinima obuhvaćena su ubistva, mučenja, silovanja, zlostavljanja i progoni žrtava.

Predsjednik Udruženja Konjičana iz Republike Srpske Zoran Pologoš u izjavi za naš list naveo je da je “konačno došlo vrijeme da se pred Sudom BiH procesuiraju zločini nad civilima srpske nacionalnosti tokom rata u BiH”. Istakao je logore Čelebići i Musala, kao i zločin počinjen na Bradini, kazavši da su u Savezu logoraša RS-a tokom posljednjih 25 godina činili sve kako bi Tužilaštvo podiglo optužnicu, a Sud adekvatno kaznio nalogodavce i izvršioce ovog zločina.

- U Bradini je ubijeno 88 ljudi, a veliki broj Srba doživio je razne vidove torture u logorima u konjičkoj opštini, prije svih u Čelebićima i na Musali, rekao je Pologoš, dodavši da je

dosad odgovaralo tek nekoliko ljudi.

- Problemi Srba u opštini počeli su dolaskom Splitske satnije u Konjic, napomenuo je Pologoš.

Jedan od članova ovog udruženja, koji je insistirao da se njegovo ime ne objavljuje, 1992. u Konjicu je ostao bez oca i strica. Kaže da su ubijeni na lokalitetu Vrdolja.

- Moja majka i brat proveli su izvjesno vrijeme u logoru, dok su pokojni otac i stric stradali u Vrdolju. Bog i narod znaju šta su nam muslimani u Konjicu radili u to vrijeme. Stradala su i djeca, strašan zločin počinjen je nad djecom iz porodica Golubović i Kuljanin, a da do danas, 25 godina kasnije, za to niko nije odgovarao. Ljudi sve manje imaju snage boriti se, odemo do Bradine, zapalimo svijeće, vjerujući da će ipak jednog dana izvršioци ovog zločina doći pred lice pravde, kazao je.

### Pritisak zbog Haaga

Iz JOB-a - Branilaca Konjica nisu željeli izlaziti u javnost dok se ne konsultuju s advokatima, poručujući da je riječ o očekivanom presingu na probosanske snage koje su odbranile zemlju, nakon nedavnih presuda u Haagu.

- Ovo je ipak pretilo čašu, na teret se stavlja zločin protiv čovječnosti, a to je, kad je u pitanju Armija RBiH, nemoguće. Svi naši komandanti su časni i čisti ljudi i ovo je klasičan pokušaj podjele krivice na tri dijela, kazali su nam iz JOB-a, insistirajući da imena ne pominjemo.

**ADNAN DEMIĆ**  
U Bradini je ubijeno

88 ljudi, a veliki broj Srba doživio je razne vidove torture u logorima u konjičkoj opštini, prije svih u Čelebićima i na Musali, rekao je

Pologoš



Srbi iz Konjica svakog maja posjećuju mjesto stradanja na Bradini



Među uhapšenima 12 Konjičana i jedan Mostarac